

摘藻堂四庫全書薈要

經部

欽定四庫全書薈要

經部

春秋屬辭卷十二

詳校官原任侍講臣王燕緒




欽定四庫全書薈要卷一千七百五

經部

春秋屬辭卷十一

元 趙沅 撰

辯名實之際第四


辯名實之際正必書王諸侯稱爵大夫稱名氏四

夷大者稱子此春秋之名也諸侯不王而伯者與中國
無伯而夷狄橫大夫專兵而諸侯散此春秋之實也夫
春秋之名實如此將以示後世曰實錄可乎曰實錄且

猶不可而況於聖人撥亂以經世之事哉此辯名實所以為春秋之要義也蓋其說有二一曰去名以全實征伐在諸侯則大夫將不稱名氏中國有伯則楚君侵伐不稱君是也一曰去名以責實諸侯無王則正不書王中國無伯則諸侯不序君大夫將畧其恒辭則稱人是也此二者實王伯升沉之會國家喪亂之由夷夏盛衰之變天下大勢之所趨而一經之樞要也是以聖人深致意焉

十九天下無王則桓公春秋闕不書王

桓三年春正月 四年春正月 五年春正月 六年

春正月 七年春二月 八年春正月 十一年春正

月 十二年春正月 十三年春二月 十四年春正

月 十五年春二月 十六年春正月 十七年春正

月

以上桓公春秋正不書王者十有三見天下之無王也春秋始於隱公所書皆諸侯首惡之事至桓弑隱

督弑宋公陳佗殺其太子而立鄭寗篡其君兄宋鄭之亂諸侯不能討又從而利之熊通因以僭號於荆則天下之亂已極矣鄭莊不臣繻葛之戰彘倫攸斃諸侯不為之變而遂至於無王矣夫天下無王乃伯者之所由興也春秋辯名實之際當天下無王之日而且書王正如他時則是經為虛文而名實亂矣故於桓公之策畧不書王以深絕不臣之諸侯於莊僖之編序齊桓伯功而與之以尊王之義其與伯者亦

所以罪諸侯也然桓文之興雖假尊王以示名義而
朝覲獄訟不至貢賦不歸諸侯之所以事天子者亦
唯弔喪送奠而已於是人情絕望於周而王風不作
自東遷以來天下之勢始一大變矣故莊僖崩葬特
削而不書與無王之簡隱顯互明此辨名實之先務也
杜氏不達此義謂由王室不班歷故劉炫規之謂昭
公二十三年至二十六年王室有子朝之亂天王居
于狄泉豈能班歷而正必書王已足以破其惑穀梁

謂桓公弑君為無王則是特一國一人之事爾皆不足
以知筆削之權其元年十八年書王者元年一君
之始十八年一君之終嫌以無王之罪蔽於一國也
二年書王者當宋公之弑嫌以無王之罪蔽於一人
也十年書王者當曹伯終生之卒嫌使是君不得正
其終也然陳侯鮑卒亦無王者史從其再赴以二日
繫月如長歷與大衍歷所推二日皆不得在一月春
秋疑以傳疑甲戌巳丑未必皆正月之日則陳侯實

卒月不得質言故不與正也穀梁傳曰桓無王其曰
王何也謹始也二年有王曰正與夷之弑也十年有
王曰正終生之卒也此說必有所從受又曰元年有
王所以治桓也則與謹始之義不同矣蓋口傳之學
易至失真其桓弟弑兄臣弑君以下云者乃以已見
尋繹師說而妄為之辭

二十中國無伯則晉靈公之盟會諸侯不序

文七年秋八月公會諸侯晉大夫盟于扈

傳曰齊侯宋公衛侯鄭伯

許男曹伯會晉趙盾
盟于扈晉侯立故也
十五年冬十一月諸侯盟于扈

傳曰

晉侯宋公衛侯陳侯鄭伯許男曹伯盟于扈尋新城之盟且謀伐齊也齊人賂晉侯故不克而還于是有齊難

是以公會
十七年夏諸侯會于扈

傳曰晉侯蒐于黃平遂復合諸侯于扈平

宋也公不與會齊難故也

以上伯國盟會不序諸侯者三見中國之無伯也晉

襄公卒靈公幼楚人已知北方可圖矣趙盾以大夫

會盟諸侯而合四國以救鄭不及楚師以三國伐宋

取賂而還新城之盟諸侯若不能忘晉者而扈之再

盟以賂不克伐齊又再會以定宋文之篡諸侯以為
晉不足與也鄭既受盟于楚而齊魯俱貳則中國遂
至於無伯矣夫中國無伯乃楚之所由興也春秋辯
名實之際當中國無伯之日而且序晉伯人楚君如
他時不幾於名實相亂乎故於靈公之盟會略諸侯
不序以明晉伯中衰而楚自厥貉而後君將皆稱君
以著其亂華之罪其爵楚君者亦所以志無伯也是
故王臣自出以盟諸侯齊商人弑其君執天子之使諸

侯恬不為動於是天下之人皆忘其上而詩盡亡自有伯以來中國之勢又一大變而王室又以無伯而愈卑矣故頃王崩葬亦削而不書與不序諸侯之簡隱顯互明此辯名實之先務也左氏不達此義於趙盾之盟曰公後至故不書所會避不敏也凡史有後至不書所會之例者蓋為公後會期不得與其成事故不書所會明不冒其功今書公會諸侯盟而乃以不序諸侯為避不敏理必不然其曰無能為無功者

義亦未盡唯陳氏謂盟會恒序諸侯於是雖伯主在
焉而亦不序見晉失伯而楚興獨得春秋微旨非諸
家所及也

三王征伐在諸侯則君將稱君大夫稱人用衆稱
師苟略其恒辭則雖君將稱人稱師一役而
再有事稱人稱師以喪行稱人

隱四年夏宋公陳侯蔡人衛人伐鄭 秋翬帥師會宋
公陳侯蔡人衛人伐鄭 十一年秋七月壬午公及齊

侯鄭伯入許

桓十年冬十二月丙午齊侯衛侯鄭伯來戰于郎 十
三年春二月公會紀侯鄭伯已巳及齊侯宋公衛侯燕
人戰齊師宋師衛師燕師敗績 十五年冬十一月公
會宋公衛侯陳侯于袤伐鄭 十六年夏四月公會宋
公衛侯陳侯蔡侯伐鄭

以上君將稱君者七春秋之初諸侯無王合黨為亂
也然征伐自諸侯出實由此而始故悉從其恒稱以

見實與後中國無伯之事同

僖四年春王正月公會齊侯宋公陳侯衛侯鄭伯許男
曹伯侵蔡蔡潰遂伐楚次于陘 六年夏公會齊侯宋
公陳侯衛侯曹伯伐鄭圍新城 十年夏齊侯許男伐
北戎 十五年十一月壬戌晉侯及秦伯戰于韓獲晉
侯 十八年春王正月宋公曹伯衛人邾人伐齊 二
十二年夏宋公衛侯許男滕子伐鄭 二十三年春齊
侯伐宋圍緡 二十八年春晉侯侵曹 晉侯伐衛

三月丙午晉侯入曹 夏四月己巳晉侯齊師宋師秦師及楚人戰于城濮楚師敗績文元年夏晉侯伐衛
二年春王二月甲子晉侯及秦師戰于彭衙秦師敗績

四年秋晉侯伐秦

以上君將稱君者十有四凡伯主將而稱君者與之
以專征討罪中國無伯諸侯將而稱君者詳其自將
以見實二者勢分不同故皆從其恒稱而善惡自見
所謂不嫌同辭也僖之初年齊君將稱君者三皆桓

公攘夷伐叛之事僖之中年晉及秦戰皆稱君惠公
背德秦穆責報齊桓不能西畧也宋襄既納齊孝圖
合諸侯稱君將二齊孝以怨報德稱君將一皆無伯
之事自僖末年至文之初晉稱君將七文公尊王定
伯功成一歲中有光齊桓襄公戰伐皆稱君與之以
繼伯也靈公不親將而盟會皆不序成公一自將伐
鄭不書政在大夫也由是觀之則伯主將稱君視諸
侯將從其恒稱者文同而義異矣

文十五年冬齊侯侵我西鄙遂伐曹入其郛 十七年
夏齊侯伐我西鄙

宣元年秋宋公陳侯衛侯曹伯會晉師于棊林伐鄭

七年夏公會齊侯伐萊 九年夏齊侯伐萊 十四年

夏晉侯伐鄭 十八年春晉侯衛世子臧伐齊成二年

春齊侯伐我北鄙 三年春公會晉侯宋公衛侯曹伯

伐鄭為下日
奠月 四年冬鄭伯伐許 十年夏公會晉侯

齊侯宋公衛侯曹伯伐鄭為下
卒月 十三年夏五月公

自京師遂會晉侯齊侯宋公衛侯鄭伯曹伯邾人滕人
伐秦 十六年六月甲午晦晉侯及楚子鄭伯戰于鄆
陵楚子鄭師敗績 秋公會尹子晉侯齊國佐邾人伐
鄭 十七年夏公會尹子單子晉侯齊侯宋公衛侯曹
伯邾人伐鄭 冬公會單子晉侯宋公衛侯曹伯齊人
邾人伐鄭

襄五年冬公會晉侯宋公衛侯鄭伯曹伯齊世子光救
陳 六年十二月齊侯滅萊 九年冬公會晉侯宋公

衛侯曹伯莒子邾子滕子薛伯杞伯小邾子齊世子光
伐鄭十二月己亥同盟于戲 十年秋公會晉侯宋公
衛侯曹伯莒子邾子齊世子光滕子薛伯杞伯小邾子
伐鄭 十一月夏公會晉侯宋公衛侯曹伯齊世子光
莒子邾子滕子薛伯杞伯小邾子伐鄭秋七月己未同
盟于亳城北 公會晉侯宋公衛侯曹伯齊世子光莒
子邾子滕子薛伯杞伯小邾子伐鄭會于蕭魚 十五
年夏齊侯伐我北鄙圍成 十六年春齊侯伐我北鄙

夏叔老會鄭伯晉荀偃衛甯殖宋人伐許 秋齊侯伐
我北鄙圍郟 十七年秋齊侯伐我北鄙圍桃 十八
年冬十月公會晉侯宋公衛侯鄭伯曹伯莒子邾子滕
子薛伯杞伯小邾子同圍齊 二十三年秋齊侯伐衛
遂伐晉 冬齊侯襲莒

昭六年冬齊侯伐北燕 十六年春齊侯伐徐 十九
年春宋公伐邾 二十二年春齊侯伐莒

定四年三月公會劉子晉侯宋公蔡侯衛侯陳子鄭伯

許男曹伯莒子邾子頓子胡子滕子薛伯杞伯小邾子
齊國夏于召陵侵楚 冬十有一月庚午蔡侯以吳子
及楚人戰于柏舉楚師敗績 九年秋齊侯衛侯次于
五氏 十三年春齊侯衛侯次于垂葭 十五年夏齊
侯衛侯次于渠蔭

哀元年秋齊侯衛侯伐晉 五年夏齊侯伐宋 八年

春王正月宋公入曹以曹伯陽歸 九年秋宋公伐鄭

以上君將稱君者四十三晉君將十六起宣末年止

襄之初十四皆景厲復伯悼公中興之事自悼而後
唯平一圍齊乃諸侯同欲定之侵楚則劉子之為舍
是晉無書君將者矣時征伐自大夫出已久然當晉
君自將則諸侯皆親以師會過不專在大夫也宣元
年宋陳衛曹之君會晉師者一明年而趙盾弑君襄
十六年叔老會鄭伯晉荀偃者一其年平新即位盖
征伐自大夫出晉實為之而以大夫用諸侯則趙盾
之無君也舍是諸侯無自將會大夫者矣齊君將二

十三伐魯者七懿二頃一靈四惠伐萊者二皆閒晉

之衰欲挾魯以自為而不事盟主也靈滅萊而不親

晉悼之盟會莊伐衛遂伐晉為伐盟主之始還遂襲

莒景伐燕伐徐伐莒而不會劉子於召陵三次而後

書伐晉且伐宋舍齊諸侯無抗晉者矣成四年一書

鄭伯伐許志其反覆乎晉楚之間也昭十九年宋公

伐邾討其入郟也入曹伐鄭而春秋終焉志中國無

伯諸侯自相吞滅也舍宋鄭諸侯無書專伐者矣孔

子曰征伐自諸侯出十世希不失矣此春秋君將書君之義也

隱二年冬鄭人伐衛 五年秋邾人鄭人伐宋 冬宋人伐鄭圍長葛 十年秋宋人衛人入鄭 宋人蔡人衛人伐戴鄭伯伐取之 冬十月壬午齊人鄭人入郕 桓五年秋蔡人衛人陳人從王伐鄭 十四年冬宋人以齊人蔡人衛人陳人伐鄭 十七年秋及宋人衛人伐邾

莊十三年夏六月齊人滅遂 十四年春齊人陳人曹

人伐宋 十五年秋宋人齊人邾人伐郕 鄭人侵宋

十六年夏宋人齊人衛人伐鄭 十九年冬齊人宋

人陳人伐我西鄙 二十年冬齊人伐戎 二十六年

秋公會宋人齊人伐徐 二十八年秋公會齊人宋人

救鄭 二十九年夏鄭人侵許 三十年冬齊人伐山

戎

僖四年冬十二月公孫茲帥師會齊人宋人衛人鄭人

許人曹人侵陳 七年春齊人伐鄭 十五年冬宋人

伐曹 十七年春齊人徐人伐英氏 十九年秋宋人

圍曹

傳記子魚之諫在國言之陳氏云宋公圍非

衛人伐邢 二十年夏

鄭人入滑

傳曰鄭公子士洩堵寇帥師入滑陳氏曰傳見入書人非也未書大夫將不得有異旨

二十六年春齊人侵我西鄙 夏衛人伐齊 三十二

年夏衛人侵狄 三十三年春王二月秦人入滑

陳氏曰孟

明視書人秦未有大夫說誤秦征伐不出大夫冬晉人陳人鄭人伐許

文元年夏衛人伐晉

傳衛孔達帥師伐晉

二年冬晉人宋人陳人

鄭人伐秦

傳曰晉先且居宋公子成陳轅選鄭公子歸生伐秦陳氏曰晉卿不書以秦伯在師蓋循

左氏之失經未書大夫將不得有異旨

三年春王正月叔孫得臣會晉人

宋人陳人衛人鄭人伐沈沈潰

隱五年秋衛師入郕

桓十七年夏五月丙午及齊師戰于奚

莊元年冬齊師遷紀邢鄆郟 三年春王正月溺會齊

師伐衛 八年夏師及齊師圍郕郕降于齊師 九年

八月庚申及齊師戰于乾時我師敗績 十年夏齊師

宋師次于郎

為下事月

冬十月齊師滅譚

僖元年春齊師宋師曹師次于聶北救邢

為朝廟告朔月

夏

齊師宋師曹師城邢 二年夏虞師晉師滅下陽

傳晉里克

荀息帥師會虞師伐虢滅下陽陳氏曰傳見滅貶稱師今案未書大夫將不得有二義

十五年

秋七月齊師曹師伐厲 十八年五月戊寅宋師及齊

師戰于甌齊師敗績 二十八年夏四月己巳晉侯齊

師宋師秦師及楚人戰于城濮

傳夏四月戊辰晉侯宋公齊國歸父崔夫秦小

子慙次于城濮杜氏曰宋公以下皆以師屬晉不與戰陳氏曰三國之君大夫但書師始伯之辭今案圍宋之

後楚子雖貶稱人猶不易其班今宋序齊下則非宋公明矣但謂齊秦皆以師屬晉則不可時征伐不出大夫齊御秦公子不書將則亦當舉師為重杜蓋不知此義陳氏又循左氏尊晉侯之失而違其本旨

文二年春王二月甲子晉侯及秦師戰于彭衙

傳秦孟明視師

師伐晉此書師例

以上征伐稱人者三十五稱師者十四皆文以前征伐不自大夫出之事莒邾而下不入例凡敗例言師小國不入例公羊傳曰將尊師衆稱某帥師將尊師少稱將卑師衆稱師將卑師少稱人君將不言帥

師書其重者此史例也將尊謂大夫而為卿者將卑
謂非卿者傳或謂之微者筆削之旨文以前征伐自
諸侯出則雖卿將稱人與將卑師少者同雖卿帥重
師但稱師與將卑師衆者同蓋征伐之權尚在諸侯
則大夫皆奉君命以行得失在其君而大夫之尊卑
不足辯也左氏考史牘征伐卿大夫有名氏而經但
書人者悉錄其名氏不為無所見而未達筆削微旨
至永嘉陳氏始發不傳之秘而侵伐圍滅異說以磔

裂其義則又失之僖以前經無書名者故傳不復詳亦或有不得名氏者然魯以卿會者則外應是卿蓋事有輕重而大夫之會必以其班非有故不得以微者徃其以微者會則大國大夫下於次國之卿若溫之盟齊人序鄭人下是也次國大夫下於小國之卿邾人鄭人伐宋是也陳氏謂微者皆不書有所重則書於是有得書人之義愈失之矣凡先儒謂小國主兵序大國之上者非莒邾而下大夫微不復序

莊二十八年春王三月甲寅齊人伐衛衛人及齊人戰

衛人敗績

傳齊侯伐衛戰敗衛師數之以王命取賂而還陳氏曰傳見齊侯闕書人

僖三十年秋晉人秦人圍鄭

傳九月甲午晉侯秦伯圍鄭以其無禮於晉且貳於

楚也

以上伯主將稱人者二秦君將稱人者一齊晉之伯

其君將稱君者皆與之也是故苟失伯討之義則奪

其恒稱衛人立子頽有輔篡之罪齊桓以王命伐衛

取賂而還晉文與秦穆同圍鄭於既服之後秦伯復

叛晉而戍鄭二事皆非伯討故雖桓文自將亦稱人皆奪其恒稱以見義也秦伯稱人雖若兩譏之自與後秦君稱人一例義與伯主不同

文三年夏秦人伐晉

傳秦伯伐晉濟河焚舟取王官及郊晉人不出

七年夏

四月戊子晉人及秦人戰于令狐

傳秦康公送公子雍于晉宣子與諸大夫

皆患穆嬴且畏偁乃背先蔑而立靈公以禦秦師戊子敗秦師于令狐陳氏曰傳見秦康公趙盾皆書人

十有二年十有二月戊午晉人秦人戰于河曲

傳秦為令狐之

後故冬秦伯伐晉取羈馮晉人禦之秦軍掩晉上軍乃皆出戰交綏秦師夜遁復侵晉入瑕

宣十五年夏秦人伐晉

傳秋七月秦桓公伐晉次于輔氏案是年夏無秦伐晉傳而七

月傳不見不書之由疑是一事而時月有誤

以上秦君將稱人者四秦穆公既倍晉而戍鄭又將
因戍人以襲鄭其心事如此使秦得志於中國其禍
豈減於楚哉喪師于穀雖嘗悔過自誓而終不能自
克既歸鬪克使求成于楚又以忿兵敗績于彭衙令
狐之役曲雖在晉然夫人太子猶在而外求君康公
無先見之明以敗其衆而報怨不已蓋自穆至景連

兵於晉者四世而楚世昏於秦矣故秦晉連兵晉君將恒稱爵而秦君自將五四稱人一但稱國以其始於倍盟以賊中國中亟於報怨而卒自附於南蠻以爲中國之罪人春秋既以繼伯討罪之義與晉襄則秦君不得稱君以敵伯主明王者之政當出於一所以渙羣疑而尊王室也其稱人之義與楚君同而又非中國諸侯之比矣胡氏乃謂聖人以常情待晉襄以王事責秦穆豈經世之義乎春秋之末多流俗之

論左氏不能辯其弊至今猶在所謂尊穆公者亦具

一也

僖二十六年夏齊人伐我北鄙

傳齊孝公伐我北鄙公使展喜犒師齊侯未入

竟展喜從之乃還

襄十八年秋齊師伐我北鄙

傳齊侯伐我北鄙

以上齊君將稱人者一稱師者一齊孝公伐魯以魯

人犒師故未入竟而去公子遂已如楚乞師伐齊取穀魯為已甚矣故雖君將但稱人為用楚師言故而

已齊靈閒晉悼之卒倍盟伐魯者四皆稱爵以見實至是又伐魯卒致十二國同圍齊之禍故雖君將但稱師為書同圍言故而已一以用楚師報伐見義一以十二國同圍見義則其自將之罪不足詳矣

隱十年春王二月公會齊侯鄭伯于中丘夏鞏帥師會

齊人鄭人伐宋

傳五月羽父先會齊侯鄭伯伐宋

桓十二年冬十一月丙戌公會鄭伯盟于武父十二月

及鄭師伐宋丁未戰于宋

傳與鄭伯盟于武父遂帥師而伐宋

僖十八年春王正月宋公曹伯衛人邾人伐齊五月戊寅宋師及齊師戰于甌

以上一役再有事君將稱人者一稱師者二欲明一事為一役故先詳後畧因上文以見之而義愈明與內事蒙上文不書公同法陳氏乃以再見稱人為貶借令不再見則遂無貶乎諸貶例皆抵牾不通本非春秋之旨故也其以內諱而稱人者已見前篇

僖三十三年夏四月辛巳晉人及姜戎敗秦師于殽

傳曰

秦孟明視西乞術白乙丙襲鄭及滑知鄭有備滅滑而還晉先軫曰秦不哀吾喪而伐吾同姓發命遽興姜戎子墨衰經四月辛酉秋晉人敗狄于箕傳曰狄伐晉八月戊子晉侯敗

箕狄于

以上未踰年君將稱人者二嗣君未踰年稱子出從盟會亦稱子以師行者稱爵從史文以見其罪也若夫方伯連率禦寇討亂則魯公伯禽嘗行之矣君子以其不以私憂廢王事無以議為也故晉襄公衰經行師聖人以其與得已不已者不同畧而稱人義不

在稱君也陳氏知二傳釋殯之譏為非而又以構秦
怨為貶則雖習於變禮之由而於當時事體有不察
者自城濮而後楚人帖息中國少寧而秦穆首為亂
階縱而弗討同盟之國何所賴乎陸氏曰晉為盟主
諸侯服之久矣秦不良其喪而襲其同姓若不能救
則先公之業隊矣故聖人為之諱許其以權變禮異
乎匹夫之孝也其論伯者繼述之義諸家所不及然
以稱人為諱則襄公之事初不必諱但不使與得已

不已者同稱所以別嫌明微唯以書敗見義而已敗
狄稱人雖莫未三年義與上同而陳氏又以為貶有
如不能敗之則將何以為稱乎

三征伐在大夫則大夫將書大夫微者稱人用

衆稱師苟略其恒稱則雖大夫將稱人稱師
文三年冬晉陽處父帥師伐楚以救江 十五年夏晉
卻缺帥師伐蔡戊申入蔡

宣元年秋晉趙盾帥師救陳 冬晉趙穿帥師侵崇

六年春晉趙盾衛孫免侵陳 九年秋晉荀林父帥師
伐陳 冬晉卻缺帥師救鄭 十二年夏六月乙卯晉
荀林父帥師及楚子戰于邲

成二年六月癸酉季孫行父臧孫許叔孫僑如公孫嬰
齊帥師會晉卻克衛孫良夫曹公子首及齊侯戰于鞍
三年秋晉卻克衛孫良夫伐廡咎如 六年冬晉欒
書帥師救鄭 八年春晉欒書帥師侵蔡 冬叔孫僑
如會晉士燮齊人邾人伐郟 九年秋晉欒書帥師伐

鄭

襄元年春仲孫蔑會晉欒黶宋華元衛甯殖曹人莒人邾人滕人薛人圍宋彭城 夏晉韓厥帥師伐鄭 三年冬晉荀瑩帥師伐許 十六年夏叔老會鄭伯晉荀偃衛甯殖宋人伐許 十九年秋晉士匄帥師侵齊至穀聞齊侯卒乃還

昭元年夏晉荀吳帥師敗狄于大鹵 十五年秋晉荀吳帥師伐鮮虞 十七年八月晉荀吳帥師滅陸渾之

戎

定四年秋晉士鞅衛孔圉帥師伐鮮虞 五年冬晉士鞅帥師圍鮮虞 八年秋晉士鞅帥師侵鄭遂侵衛 十年夏晉趙鞅帥師圍衛

哀二年夏晉趙鞅帥師納衛世子蒯聩于戚 秋八月甲戌晉趙鞅帥師及鄭罕達帥師戰于鐵 五年夏晉

趙鞅帥師伐衛 六年春晉趙鞅帥師伐鮮虞 七年春晉魏曼多帥師侵衛 十年夏晉趙鞅帥師侵齊

十三年秋晉魏曼多帥師侵衛

以上晉大夫將書大夫者三十三皆文以後征伐自大夫出之事晉至襄公之末大夫已專陽處父為大傅盟魯侯以王叔桓公伐楚改蒐于董易中軍其汰已甚卒取殺身之禍故經沒桓公而書大夫帥師於是始趙盾衰之子也立靈公再專合諸侯屢主兵征伐卒將趙穿以陷於篡弑之罪又立成公而相之晉不競者再世而六卿之禍遂成郤缺芮之子也傅克

而益專至錡至犛而敗荀林父孫偃庚之子也與欒書同弒厲公傅吳至寅而敗荀瑩首之子也傅盈與躒至瑤而敗荀首者林父弟林父之後世襲中行故稱中行氏首分族稱知氏欒書盾之子也傅黶至盈而敗士燮會之子也傅匄與鞅至吉射而敗韓厥之子起起孫不信魏曼多舒之孫也趙氏再起至鞅而復彊三家相結以傾范中行氏卒滅知氏三分晉地而自列為諸侯凡皆世卿之效也孔子曰禮樂征伐

自大夫出五世希不失矣此春秋大夫將書大夫之義也然襄以前大夫將有書人以見義者自昭而後大夫將皆從其恒稱何也稱人見義者以大夫征伐猶有關天下之故也春秋為天下作非有關於天下之故奚議焉自昭而後晉人志不在諸侯而盡力於羣狄伐鮮虞滅陸渾利其俘獲爾齊衛鄭鮮虞助范中行以抗趙韓魏氏故趙鞅納蒯賁戰鄭罕達侵齊伐衛伐鮮虞魏曼多侵衛皆從其恒稱志彊家之亂

而已

襄元年夏仲孫蔑會齊崔杼曹人邾人杞人次于鄆

十七年秋高厚帥師伐我北鄙圍防 二十四年秋齊

崔杼帥師伐莒 二十五年春齊崔杼帥師伐我北鄙

昭十二年春齊高偃帥師納北燕伯于陽 十九年秋

齊高發帥師伐莒

定七年秋齊國夏帥師伐我西鄙 八年夏齊國夏帥

師伐我西鄙

哀三年春齊國夏衛石曼姑帥師圍戚 十一年春齊
國書帥師伐我

以上齊大夫將書大夫者十其事獨在襄公中歲以
後齊自國高以天子命卿為桓公內主子孫世執其
政然自孝而下多彊君威福自已出至靈公間晉伐
魯而高厚始書帥師又廢太子光而使厚傅牙以為
太子及崔杼立莊公厚以從君於昏見殺杼既專國
弑君而卒以家禍覆其宗出慶封放高止公族猶有

人焉其後陳氏以厚施得民景公君臣知其必有齊國而莫如之何國高之後猶以世卿帥師而齊人再世弑君不能討至國夏高張乃見逐書以後為陳氏後而已

宣二年春王二月壬子宋華元帥師及鄭公子歸生帥師戰于大棘宋師敗績獲宋華元

哀三年夏宋樂髡帥師伐曹 六年冬宋向巢帥師伐曹 七年春宋皇瑗帥師侵鄭 九年春宋皇瑗帥師

取鄭師于雍丘 十二年秋宋向巢帥師伐鄭

以上宋大夫將書大夫者六宋卿皆公族也昭公之弑華氏與焉華元為右師以相文公出魚氏殺楚使者幾亡國然國於晉楚之間衛鄭交侵而不私圖報復以聽於伯主既又以善於晉楚大夫克合南北之成以向戌為左師而向戌亦以善於晉楚大夫挾弭兵之說成宋之盟故宋大夫書帥師自華元始而歷四世無書大夫將者蓋晉人欲以偪陽封向戌戌能

讓歸其君既而以弭兵請賞公與之邑司城子罕削而投之向氏欲攻司城左師曰我將亡夫子生我則三子者之從政亦有異於專兵以徼利弱公室而自封者焉至樂髡向巢皇瑗始滅曹與鄭連兵無虛歲然巢既以弟魋叛奔魯而瑗亦以子縻故殺身則大夫書將之義可謂明矣

成二年夏四月丙戌衛孫良夫帥師及齊師戰于新築

六年春衛孫良夫帥師侵宋

傳三月晉伯宗夏陽說衛孫良夫寤相鄭人伊

雒之戎陸渾蠻氏侵宋

十年春衛侯之弟黑背帥師侵鄭 十七

年春衛北宮括帥師侵鄭

襄二年夏晉師宋師衛甯殖侵鄭 十七年夏衛石買

帥師伐曹 十九年夏衛孫林父帥師伐齊

定四年秋晉士鞅衛孔圉帥師伐鮮虞 十二年夏衛

公孟彊帥師伐曹 十三年夏衛公孟彊帥師伐曹

哀三年春齊國夏衛石曼姑帥師圍戚

以上衛大夫將書大夫者十一其以會伐再見者已

具晉大夫類中當晉襄之伯孔達以國故干晉以見
討晉人良而免之既又背盟救陳見殺孫免會趙盾
所帥師少故不言帥師良夫世為卿子林父與甯殖
出其君而立剽剽黑背之子也殖子喜又弑其所事
之君而納故君卒以見殺林父入于戚以叛北宮結
以公叔戍之黨逐公孟彊以蒯贖之黨逐孔圉取蒯
贖之姊生懼蒯贖因孔姬以劫懼而復國懼亦卒逐
石買背盟伐魯見執伯主曼姑為輒拒父皆無足道

者觀延陵季子與孔子之言則衛之末世猶有人焉
故雖靈公無道而禍不出於世卿云

定四年夏四月庚辰蔡公孫姓帥師滅沈以沈子嘉歸
殺之 十四年二月辛巳楚公子結陳公孫佗人帥師
滅頓以頓子牂歸

以上陳蔡大夫將書大夫者各一陳蔡國小而後於
楚無大國世卿之禍政在公族故二公孫以帥師書
然二國之為惡者非公子則公孫也

宣二年春王二月壬子宋華元帥師及鄭公子歸生帥師戰于大棘

成三年夏鄭公子去疾帥師伐許 十四年秋鄭公子

喜帥師伐許 十六年夏鄭公子喜帥師侵宋 襄十

一年夏鄭公孫舍之帥師侵宋 二十五年六月壬子

鄭公孫舍之帥師入陳 冬鄭公孫夏帥師伐陳定六

年春王正月癸亥鄭游速帥師滅許以許男斯歸 十

五年夏鄭罕達帥師伐宋

哀二年秋八月甲戌晉趙鞅帥師及鄭罕達帥師戰于鐵
七年冬鄭駟弘帥師救曹
十三年春鄭罕達帥師取宋師于茁

以上鄭大夫將書大夫者十有二鄭在春秋為次國
自侯宣多後無復異姓之卿公子歸生受命于楚以
伐宋敗宋師獲華元而卒以首惡書其後鄭人討幽
公之亂斲子家之棺逐其族而穆氏大興于鄭傳記
穆公之子十一人其為卿者九人去疾字子良能不

受國而讓歸其兄其伐許也楚人以為討而鄭伯背
楚歸晉遂世與許仇以至滅許至孫良霄而敗是為
良氏喜字子罕子豐欲愬其君於晉喜能止之子舍
之孫罕虎皆賢是為罕氏駙字子駟當晉楚爭鄭始
則受楚田而叛晉以伐宋遂與宋仇終則反覆兩閒
以使晉人盡力於鄭楚不敢爭而後固與晉然上弑
其君而下侵欲於人卒殺其身以及二卿子夏孫偃
是為駟氏發字子國與於子駟之難子僑孫參是為

國氏偃字子游子蔓孫吉是為游氏嘉字子孔知子
駟之難而不告又將叛晉而起替帥以去諸大夫子
展子西殺之而分其室子豐之後為印氏是時子產
之賢聞於諸侯子展當國即能立以為卿而子皮卒
授之政當晉六卿擅國魯三家不臣齊崔慶顛覆楚
人肆暴陳蔡危亡之餘鄭獨隱然其間以禮自持內
無世卿之禍外免大國之侮則子產之功也然則子
展子皮賢於臧文仲遠矣至罕達復修宋怨而駟弘

救曹無功則鄭亦衰焉此外唯曹公子首以鞍之戰
書小國無彊家不復序

文五年夏秦人入郟 十五年夏齊人侵我西鄙 宣
元年冬晉人宋人伐鄭 九年冬宋人圍滕 十二年
冬衛人救陳

成九年冬秦人白狄伐晉 鄭人圍許 十二年秋晉
人敗狄于交剛

襄四年冬陳人圍頓 十一年冬秦人伐晉

宣二年春秦師伐晉 三年秋宋師圍曹 八年夏晉

師白狄伐秦 十年夏宋師伐滕 為下 莫月 十二年冬宋

師伐陳 十三年春齊師伐莒

襄二年春鄭師伐宋 夏晉師宋師衛甯殖侵鄭

以上征伐稱人者十稱師者八皆文以後征伐自大

夫出時事左氏不記名氏以其皆微者不復詳亦或

有不得其名氏者春秋之初征伐在諸侯帥師不必

皆卿故書人書師多微者自大夫專兵之後微者帥

師亦少觀魯自三家專兵而後無微者將與此所序則可知矣晉悼公卒而後大夫將皆從其恒稱故以後微者之師不復辯

文七年夏四月戊子晉人及秦人戰于令狐

傳趙盾將中軍先克

佐之荀林父佐上軍先蔑將下軍先都佐之戊子敗秦師于令狐

九年春公子遂會

晉人宋人衛人許人救鄭

傳公子遂會晉趙盾宋華耦衛孔達許大夫救鄭不及楚

師

十四年秋晉人納捷菑于邾弗克納

傳趙盾以諸侯之師八百

乘納捷菑于邾

十七年春晉人衛人陳人鄭人伐宋

傳晉荀林父衛

孔達陳公孫寧鄭石楚伐宋討
曰何故弑君猶立文公而還

宣二年夏晉人宋人衛人陳人侵鄭

傳趙盾救焦遂自陰地及諸侯之師

侵鄭

十年夏晉人宋人衛人曹人伐鄭

傳諸侯之師伐鄭取成而還案

是時鄭已及楚平晉必不使微者將而伐鄭春秋亦無四國皆微者會兵之事鄭亦必不與微者成傳雖不得名氏明四國皆卿也十五年六月癸卯晉師滅赤狄潞氏以潞

子嬰兒歸

傳晉荀林父敗赤狄于曲梁辛亥滅潞

十六年春王正月晉

人滅赤狄甲氏及留吁

傳晉士會帥師滅赤狄甲氏及留吁鐸辰

襄十年夏晉師伐秦

傳荀躒伐秦報其侵也

以上晉大夫將書人者三稱師者二晉大夫與諸侯
之大夫將稱人者四凡大夫將稱大夫者征伐自大
夫出也苟動不以正與不堪其事則又奪其恒稱趙
盾專國立君不審為令狐之後以再起秦怨興兵以
納不正見辭於邾人荀林父士會當宋告急畏楚不
能救而甘心於羣狄晉楚方爭鄭不能釋秦以畢事
於楚荀瑩伐秦徒曰報其侵而已此皆所謂動不以
正也則奪其恒稱固宜然趙盾孫免侵陳書名氏而

救鄭伐宋侵鄭伐鄭凡四大舉皆書人者陳侯既同
新城之盟楚子侵陳趙盾救之而陳又叛晉從楚則
侵之得討貳之宜也趙盾將五國之衆救鄭而不及
楚師宋人弑君林父與諸侯之大夫伐宋猶立文公
而還鄭伯曰晉不足與也遂受盟于楚於是趙盾又
以諸侯之師侵鄭遇楚輒還鄭伯既會晉侯于黑壤
于扈楚子伐鄭而晉卻缺救鄭鄭伯亦敗楚師于柳
羆鄭之從晉非不堅也晉雖得鄭而終不能服楚則

鄭豈能當楚之驟伐哉故柳棼既敗楚師而子良憂之明年鄭及楚平懼晉之不足恃也於是晉又以諸侯伐鄭取成而還明年楚子陳侯鄭伯盟于辰陵又明年楚子入陳又明年楚子圍鄭而荀林父喪師于邲故是四役皆稱人惡其以大夫而專伯討既不能以信義屬諸侯又不能以武力震楚而徒為是紛爭也

襄八年夏鄭人侵蔡獲蔡公子變

傳鄭子國子耳侵蔡獲蔡司馬公子變五

月會于邢丘

十四年夏叔孫豹會晉荀偃齊人宋人衛北宮

括鄭公孫薑曹人莒人邾人滕人薛人杞人小邾人伐

秦

為下事月閏傳諸侯之大夫從晉侯伐秦以報櫟之後也晉侯待于竟使六卿帥諸侯之師以進及涇不

濟叔向見叔孫穆子穆子賦匏有苦葉叔向退而具舟

魯人莒人先濟鄭子驕衛北宮懿子見諸侯師而勸之

濟濟涇而次子驕帥鄭師以進師皆從之至械林不獲

成馬荀偃令曰鷄鳴而駕塞井夷竈唯余馬首是瞻櫟

廩曰晉國之命未有是也余馬首欲東乃歸下軍從之

乃命大還晉人謂之還廷之後櫟鍼曰此後也報櫟之

敗也後又無功晉之恥也吾有二位于戎路敢不恥乎

與士鞅馳秦師死馬於是齊崔杼宋華元閔仲江會伐

秦不書情也向之會亦如之衛北宮括不書於向書於

伐秦攝也十九年四月丁未鄭公孫薑卒晉侯以其善

於伐秦也請於王追
賜之大路使以行

以上鄭大夫將稱人者一諸侯之大夫會伐而齊宋
大夫特稱人者一鄭大夫將於他後或從晉或從楚
皆從其恒稱而侵蔡獨稱人者鄭反覆於晉楚之間
久矣事之善惡不待變文而見故大夫將皆從其恒
稱於是僖公如會公子駢道弑君而立簡公生五年
矣公子發又為之侵蔡而奉其幼君以獻捷于會將
以說晉而免鄭於討也悼公果寘其罪不問是歲楚

人伐鄭子駟子國又定畫從楚蓋中國之勢苟未得
鄭則未可以圖蔡鄭人內懷反覆而侵蔡以欺盟主
故晉卒歸公子變于蔡而春秋于鄭大夫獨奪其恒
稱伐秦之後晉衛鄭大夫皆從其恒稱而齊宋大夫
稱人者傳以為齊宋大夫不進師也是年春會吳于
向齊宋衛大夫皆稱人一役之中而有與奪以悼公
之情也抑中國之不競諸侯亦有罪焉自令狐以來
晉與秦交兵大夫將皆稱人而荀偃獨從其恒稱者

悼公以諸侯之師伐秦庶幾能張中國之勢討秦人
黨楚之罪而齊宋大夫不進師則悼公之令外不行
於列國矣苟偃欲進而欒黶先歸則悼公之令內不
行於臣子矣故苟偃得從其恒稱譏不在苟偃也諸
侯大夫知有伯之無益於已而不知無伯之禍又有
甚焉故情慢不攝如此譏不徒在晉也自伐秦而後
大夫將無異辭苟無中國之志則不足議也晉襄公
卒而楚君將稱君伯業之偏安也悼公卒而大夫將

皆從其恒稱則春秋治在夷狄矣

昭二十三年春晉人圍郊

以上晉大夫將稱人者一大夫將從其恒稱久矣此藉談荀躒也其復書人何也晉悼公卒而大夫將皆從其恒稱者苟非伯者之事則其名實不足辨也若夫諸侯實力王室乃臣子之分所當為不唯責在伯者以晉大夫怠於勤王而從其恒稱是君臣大義以無伯而廢天理民彝以無伯而泯也故特變而稱人

明晉雖失伯而王室在難乃諸侯所當勤有不可一日緩者又一義也齊陳恒弑其君孔子沐浴而朝告於哀公請討之曰以吾從大夫之後不敢不告時夫子方修春秋而不忘討賊如此則其制作之意豈徒曰辯伯者之功過以示後世而已哉晉人怠於勤王事已見第二篇

二十三征伐君大夫將稱人不足以盡意則但稱國
文十年夏秦伐晉

成三年冬鄭伐許

昭十二年冬晉伐鮮虞

以上君大夫將稱國以伐者三凡夷狄舉號君臣同辭如戎狄於越淮夷是也若荆吳與徐則本非夷狄荆吳既僭王猶夏而徐之先亦嘗僭王故春秋於此三國者皆以號舉穀梁傳釋荆曰狄之則徐吳從可知也然此猶史例也若傳於晉伐鮮虞亦曰狄之而何氏范氏陳氏因推以釋秦伐晉鄭伐許則非復史

例矣蓋君大夫將稱人者變文以示義也其或稱人
不足以盡意則但稱國以異之辭愈畧者義愈深也
然既同於舉號則亦豈諸侯中國之恒稱哉秦嘗再
納晉君城濮翟泉小子憇皆在焉不為無功於中國
而穆公叛晉以襲鄭敗殺敗彭衙而秦不自反連兵
報復者再世終春秋秦為楚役卒使楚人得志於中
國故春秋晉侯伐秦稱爵而秦伯伐晉皆稱人令狐
而後秦晉交兵不悉書而秦伯伐晉但書秦杜而絕

之同於夷狄而已自晉楚爭鄭鄭受兵無虛歲辰陵
竊盟於楚而又徼事於晉既從楚以拒晉又一歲中
再伐許以怒楚其反覆乎晉楚之間誠狄道也故再
伐許稱國言非復中國諸侯也晉雖不競猶稱盟主
楚合諸侯于申伐吳滅陳誘蔡侯般殺之滅蔡而晉
人方以詐滅肥伐鮮虞甘心於羣狄故伐鮮虞稱國
責其棄中國於楚聽其吞滅非復諸侯之盟主也是
皆筆削之旨也蓋狄秦則諸侯之從楚者絕意於中

國矣狄鄭則諸侯之反覆乎晉楚之間者不足賴矣
至於狄晉則天下諸侯皆楚之從而晉之為盟主也
末矣此春秋所以治在夷狄也

孟外盟會恒稱君大夫微者稱人內微者但稱
會苟奪其恒稱則外君大夫俱稱人內稱會
同微者一後再有事稱人

僖二年秋九月齊侯宋公江人黃人盟于貫
莊十五年春齊侯宋公鄭侯衛侯鄭伯會于郵

僖三年秋齊侯宋公江人黃人會于陽穀

宣九年秋晉侯宋公衛侯鄭伯曹伯會于扈

為下
卒月

僖二十一年秋宋公楚子陳侯蔡侯鄭伯許男曹伯會于孟

以上伯主之盟一會三宋楚之會一皆從其恒稱凡盟會吾君大夫在焉者皆序見第一篇外離盟參盟序見第二篇楚主盟會序見下篇君稱爵大夫稱名氏微者稱人內微者但稱會皆從主人之辭此不重

序

僖十九年冬會陳人蔡人楚人鄭人盟于齊

公羊作公會趙氏以

為諱不書公據左氏此會為陳穆公請修好于諸侯以無忘齊桓之德而不言公會盟于齊雖齊桓盛時亦無諸侯會盟于齊之事况魯有救四公子之嫌終孝公世僖公未嘗如齊其後卒為仇敵則此盟非公親往可知楚僭大號未嘗與中國會盟觀蜀之盟楚嬰齊秦說序宋陳衛卿上則其卑諸侯可見其貴卿必不肯序陳蔡大夫下此蓋陳蔡皆卿而楚以微者往會故楚序陳蔡之下鄭又序楚下如蜀之盟齊大夫序鄭下皆非卿也此內稱會為微者無疑

二十一年春宋人齊人楚人盟于鹿上

宋齊皆卿楚微者

成二年十一月丙申公及楚人秦人宋人陳人衛人鄭

人齊人曹人邾人薛人鄆人盟于蜀

傳公及楚公子嬰齊蔡侯許男秦右

大夫說宋華元陳公孫寧衛孫良夫鄭公子去疾及齊國之大夫盟於蜀于是乎畏晉而竊與楚盟蔡侯許男不書乘楚車也謂之失位

以上列國大夫與楚人盟書人者三自齊桓公卒宋

襄暴虐陳穆公請修好於諸侯以無忘齊桓之德初

以諸侯大夫會盟而楚人得與中國盟會於是始宋

襄又不度德量力求諸侯於楚而為鹿上之盟至有

孟之執辱泓之敗績於是魯挾楚以抗齊為東諸侯
事楚之始陽橋之後納賂請平公會楚公子嬰齊及
十一國之大夫盟于蜀則夷夏之分蕩然矣故三盟
列國大夫皆奪其恒稱責其墮中國之大義也內不
諱公者陽橋之後由魯致之公親會嬰齊而即魯地
為盟事不可諱而亦與內惡私恥不同故不沒公以
見實也至晉楚為宋之盟以南北諸侯交相見乃從
其恒稱者聖人不以空言作經其有辯於名實之際

蓋將以正名而責實也齊與鹿上召陵之威烈未泯
蜀之盟雖曰東方諸侯皆在而猶有晉也故皆奪其
恒稱以示義晉悼公卒齊始叛晉晉知不競於楚而
遂以諸侯與之則春秋將何所辯乎故晉楚之盟會
大夫亦從其恒稱以見實而已

僖二十九年夏六月會王人晉人宋人齊人陳人蔡人

秦人盟于翟泉

傳公會王子虎晉狐偃宋公孫固齊國
歸父陳轅濤塗秦小子憇盟于翟泉

莊十三年春齊侯宋人陳人蔡人邾人會于北杏

襄八年夏季孫宿會晉侯鄭伯齊人宋人衛人邾人于

邢丘

傳五月甲辰會于邢丘以命朝聘之數使諸侯之大夫聽命季孫宿與齊高厚宋向戌衛甯殖邾大

夫會之鄭伯獻捷于會故親聽命

以上列國大夫盟王子稱人者一會伯主稱人者二禮卿不會公侯豈有列國大夫上盟王子之理翟泉之盟下陵上替之始也故王子與大夫皆變文稱人以尊王室而沒公不書凡大夫會諸侯經皆直書而失自見北杏邢丘會列國大夫以聽政乃伯主之所

得行故大夫稱人以尊伯主經所以獎成伯功也傳曰大夫不書尊晉侯也北杏傳不得大夫名氏故於邢丘發例陳氏解會盟于幽為齊初主盟不言公與奪不一以經傳事理考之非是

宣十二年冬晉人宋人衛人曹人同盟于清丘

傳晉原穀宋華

椒衛孔達曹人同盟于清丘曰恤病討貳于是卿不書不實其言也宋為盟故伐陳衛人救之

襄十四年春王正月季孫宿叔老會晉士匄齊人宋人衛人鄭公孫蠆曹人莒人邾人滕人薛人杞人小邾人

會吳于向

傳會于向為吳謀楚故也于是齊崔杼宋華閱仲江會不書情也衛北宮括不書于向書

于伐秦攝也

二十六年夏公會晉人鄭良霄宋人曹人于

澶淵

傳衛人侵戚東鄙孫氏愬于晉晉為孫氏故名諸侯六月公會晉趙武宋向戍鄭良霄曹人于澶淵

以討衛疆戚田

三十年冬晉人齊人宋人衛人鄭人曹人莒

人邾人滕人薛人杞人小邾人會于澶淵宋災故

傳曰為宋

災故諸侯之大夫會以謀歸宋財冬十月叔孫豹會晉趙武齊公孫蠆宋向戍衛北宮佗鄭罕虎及小邾之大夫會于澶淵既而無歸于宋

以上大夫同盟稱人者一會而有稱大夫有稱人者

二會而稱人者一清丘同盟晉以原穀主之而衛人背盟救陳大夫不足主諸侯明矣澶淵之會謀歸宋財既而無歸合諸侯以行私惠而又不踐其言非盟主之道也故皆奪其恒辭稱人叔孫豹會不書陳氏曰譏不在魯也向之會齊宋衛大夫以惰慢不攝稱人澶淵之會以鄭不助叛臣故良霄獨從其恒稱與奪之義著矣自昭公而後大夫之會皆從其恒稱不足議也楚圍尋宋之盟于虢合十有一國于申伐吳

執齊慶封遂滅賴滅陳執陳公子招殺陳孔奐誘蔡
侯般殺之圍蔡滅蔡而晉合八國于厥憇不能救蔡
合十國于黃父不能勤王合六國于扈不能納魯昭
公春秋治在夷狄而晉之君卿不足議則從其恒稱
可也

桓十年冬十二月丙午齊侯衛侯鄭伯來戰于郎 十
一年春正月齊人衛人鄭人盟于惡曹

以上一役再有事前稱君後稱人者一戰稱君盟稱

人者前書來戰則其罪已著矣欲明二事為一後故蒙上文畧稱人以見之也陳氏曰此戰郎諸侯也凡一後而再見者但人之畧之也

春秋屬辭卷十一

欽定四庫全書薈要卷一千七百六

經部

春秋屬辭卷十二

元 趙汭 撰

謹華夷之辯第五

三曰謹華夷之辯中國之視夷狄猶天地冠履也而又何謹焉信大義於天下也孔子曰管仲相桓公霸諸侯一匡天下民到於今受其賜微管仲吾其被髮左衽矣此春秋外夷狄之義也然自晉霸中衰楚君將皆稱君

其大夫將皆稱大夫疑於中國矣入陳圍鄭平宋而晉人以為天方授楚不可與爭盟于蜀而東方諸侯莫敢不至盟于宋而南北之勢成諸侯交相見矣申之會十有一國宋世子與淮夷俱繼小國之君於是伐吳滅陳滅蔡皆假討賊之義以號於天下俄而復陳與蔡天下知有楚而已是故終春秋書楚事無一不致其嚴者所以信大義於天下也以此坊民後世猶有謂春秋與楚以伯者則先王經世之略不明久矣蓋楚至東周始彊

於四夷僭王其國志吞中夏故伯者之興得以攘却為
功世雖無桓文而中國之大義不可一日而不信也凡
春秋書楚事與中國異辭者悉著于篇而吳越與徐以
類見焉

二五荆始伐中國以號舉

莊十年秋九月荆敗蔡師于莘以蔡侯獻舞歸

傳息侯使謂楚

文王曰伐我吾求救於

蔡而伐之楚子從之

十四年秋七月荆入蔡

傳蔡哀侯

為莘故繩息媯以語楚子楚子如息以食入享遂滅息以息媯歸生堵敖及成王馬未言曰吾一婦人而事二

夫其又莫言楚子以

蔡侯滅息遂伐蔡

十六年秋荆伐鄭

傳鄭伯自櫟入緩告于楚

秋楚伐

鄭及櫟

二十八年秋荆伐鄭

傳楚令尹子元以車六百乘伐鄭陳氏曰子元

不書人楚未

有大夫也

以上楚君大夫將同稱荆者四楚自武王熊通僭王

猾夏吞滅漢陽諸姬子文王熊資莊四年立滅鄧滅

息魯史不書無告命也敗蔡入蔡再伐鄭皆以號舉

君臣同辭與於越戎狄等不得比中國大夫將稱人

此中國夷狄之常分而策書之舊章也故程伯子曰

春秋謹華夷之辯

二十六年中國有伯楚君大夫將同稱人唯曾得稱君

僖元年秋楚人伐鄭

傳鄭即齊故也

二年冬楚人侵鄭 三

年冬楚人伐鄭

五年秋楚人滅弦

傳楚鬬穀於菟滅弦見穀於菟書人

六年秋楚人圍許

傳秋楚子圍許以救鄭見楚子書人

十一年冬楚

人伐黃

十二年夏楚人滅黃

十五年春楚人伐徐

冬楚人敗徐於婁林

二十年冬楚人伐隨

傳鬬穀於菟伐

隨

二十二年冬十一月己巳朔宋公及楚人戰于泓

宋師敗績

傳十一月己巳朔宋公及楚人戰于泓宋師敗績公傷股門官殲焉丙子晨鄭文夫人芊

氏姜氏勞楚子于柯澤楚子使師緡示之俘馘丁丑楚子入享于鄭二十三年五月宋襄公卒傷于泓故也傳

見楚子君將稱人宋公身敗稱師

二十三年秋楚人伐陳

傳楚成得臣帥師伐

陳 二十五年秋楚人圍陳納頓子于頓

傳楚令尹子玉追秦師弗

及遂圍陳納頓子于頓

二十六年秋楚人滅夔以夔子歸

傳楚成得

臣鬬宜申帥師滅夔

冬楚人伐宋圍緡

傳楚令尹子玉司馬子西帥師伐宋圍緡

二十七年冬楚人陳侯蔡侯鄭伯許男圍宋

傳冬楚子及諸侯圍

宋二十八年三月晉侯入曹執曹伯畀宋人楚子入居于申使申叔去穀使子玉去宋傳言楚子親圍宋踰年

而後入居于申以避晉侯見序諸侯上而稱人者楚子也陳蔡鄭許皆楚之屬而魯亦附楚故史序楚子主兵列諸侯上至夫子修春秋乃去爵稱人左氏雖不能顯發此義而凡經書人而傳志可考其將為君為卿者皆謹錄之則未為無所見也杜氏乃謂楚子恥不得志以微者告則非唯不達經旨亦非左氏之意矣自楚見經至伐麋以前未有稱君大夫將者豈皆以微者告耶經稱楚人於諸侯上而傳言楚子君將稱人之法甚明為左氏學者必謂君臣不可同貶稱人其失在以詳略為褒貶故也

二十八年春楚人

救衛 夏四月己巳晉侯齊師宋師秦師及楚人戰于

城濮楚師敗績

傳夏四月戊辰晉侯宋公齊國歸父崔天秦小子憇次于城濮己巳晉師陳于

莘北胥臣以下軍之佐當陳蔡子玉以若敖之六卒將中軍子西將左子上將右陳蔡奔楚右師潰狐毛狐偃

以上軍夾攻子西楚左師潰楚
成得臣書人楚未有大夫將也

文三年秋楚人圍江 四年秋楚人滅江 五年秋楚

人滅六

傳楚成大心仲歸帥師滅六

九年春楚人伐鄭

傳范山言於楚子曰

晉君少不在諸侯北方可圖也楚子師于狼淵以伐鄭因公子堅公子尨及樂耳鄭及楚平

以上楚君大夫將同稱人者二十二楚自成王顯立

始聘于魯稱荆人自僖元年伐鄭始稱楚人蓋初號

楚也魯既通其好命同其會盟故史避其僭號假子

爵以紀事而圍許雖君將稱人者世方有伯主以討

其猾夏之罪則夫子并削其子爵明當一切正以王法革其偽號不得從史氏隱避假借之文比中國君將稱君也既而圍陳納頓子滅夔伐宋圍緡而魯亦以楚師伐齊取穀楚申公叔侯戍之楚子又合陳蔡鄭許之君以圍宋時曹衛皆已服于楚使非晉文之興則天下盡為楚矣故圍宋之役楚子雖主兵序諸侯上而去爵稱人者不使夷狄主諸侯與中國伯者同也晉伯中衰楚圖北方其君親將以伐鄭而猶不

得稱爵者諸夏之心猶不忘晉則不使楚人一日得與中國抗衡也蓋楚既僭王則周之叛臣也吞滅諸夏則中國之賊也故春秋當中國有伯則楚君大夫將皆稱人明中國之大義以信桓文之志也

僖十九年冬會陳人蔡人楚人鄭人盟于齊 二十一
年春宋人齊人楚人盟于鹿上 秋宋公楚子陳侯蔡
侯鄭伯許男曹伯會于孟執宋公以伐宋

以上書楚人序陳蔡下盟者一序宋齊下盟者一書

楚君序宋公下陳蔡上會者一四國皆大夫楚亦以
微者會故序陳蔡之下其志則未可知也蔡服楚已
久陳蔡匹也楚固以屬國視之宋公雖序楚上卒執
宋公以伐宋則夷狄之情見矣經於將兵稱人既變
文以示義則盟會從其恒稱以見實也

二十七中國無伯則楚君將稱君略之而後稱人疑
於討賊稱師

文十年冬楚子蔡侯次于厥貉

傳陳侯鄭伯會楚子于
息冬遂及蔡侯次于厥

貉將以伐宋宋公逆楚
子夢且道以田孟諸

十一年春楚子伐麋
陳氏曰楚初書

也君將

宣元年秋楚子鄭人侵陳遂侵宋 三年春楚子伐陸

渾之戎 四年冬楚子伐鄭 九年冬楚子伐鄭 十

年冬楚子伐鄭 十一年冬十月楚人殺陳夏徵舒丁

亥楚子入陳納公孫寧儀行父于陳 十一年春楚子

圍鄭 夏六月乙卯晉荀林父帥師及楚子戰于邲晉

師敗績 冬十二月戊寅楚子滅蕭 十二年夏楚子

伐宋

十四年秋楚子圍宋

為下
葬月

成十五年夏楚子伐鄭

十六年六月甲午晦晉侯及

楚子鄭伯戰于鄆陵楚子鄭師敗績

十八年夏楚子

鄭伯伐宋宋魚石復入于彭城

襄九年冬楚子伐鄭

十一年秋楚子鄭伯伐宋 二

十四年夏楚子伐吳

冬楚子蔡侯陳侯許男伐鄭

二十六年冬楚子蔡侯陳侯伐鄭

昭四年秋七月楚子蔡侯陳侯許男頓子胡子沈子淮

夷伐吳執齊慶封殺之遂滅賴 五年冬楚子蔡侯陳
侯許男頓子沈子徐人越人伐吳 十一年夏四月丁
巳楚子虔誘蔡侯般殺之于申 十二年冬楚子伐徐
十六年春楚子誘戎蠻子殺之

定十五年二月辛丑楚子滅胡以胡子豹歸

哀元年春楚子陳侯隨侯許男圍蔡

以上楚君將稱君者二十八晉靈不君趙盾非伯者
之佐晉不足以主夏盟故春秋於靈公之世盟會每

略諸侯不序以明中國無伯而楚君將稱君於是始
故次厥貉伐麋以後無役不稱爵而伐鄭伐吳稱爵
主兵無異中國之伯者矣蓋中國有伯則春秋略之
以正其名中國無伯則春秋詳之以著其實不正其
名則不足以信攘却之義不著其實則不足以見夷
狄之彊然泓之戰宋公稱爵而楚子稱人不使夷狄
之君得抗中國諸侯也邲之戰楚子稱爵而荀林父
稱氏名見蠻夷侵叛乃中國之所得討也泓之戰宋

公身傷以卒而但書師敗績為中國諱也鄆陵之戰直書楚子敗績治其罪也然則雖書君將而與待中國諸侯伯主之法不可同年而語矣學者見左傳益子戰國策皆有五伯之文而荀卿書以齊桓晉文楚莊吳闔廬越勾踐為五伯因欲退闔廬勾踐而進宋襄秦穆以當之據傳記齊國佐之言曰四王之王也樹德而濟同欲焉五伯之伯也勤而撫之以役王命以五伯對四王言與孟子以五伯對三王言不異則

杜氏謂夏伯昆吾商伯大彭豕韋周伯齊桓晉文者
近之若夫楚莊吳闔廬越勾踐乃中國大義所當攘
却而所謂勤而撫之以從王命者於宋襄秦穆亦何
取焉傳又言秦穆公遂伯西戎孟子亦言其用百里
奚而伯此蓋循習流俗矜尚之辭如稱當時大國為
萬乘之君相類皆因人所恆言而言之不可通於春
秋至其論春秋之事唯曰齊桓晉文而已

文十六年秋楚人秦人巴人滅庸

傳庸人帥羣蠻以叛
楚楚使廬戢黎侵庸

七遺皆北楚于乘駟會師于臨品秦
人巴人從楚師羣蠻從楚子遂滅庸

宣五年冬楚人伐鄭

傳楚子伐鄭六年冬楚人伐鄭取成而還不書

以上楚君滅稱人者一自伐麋為楚書君將之始以
後書君將皆詳其吞啞中國之罪故凡有事於蠻夷
皆略稱人伐鄭書人者一去年冬楚子伐鄭不服至
是又親伐故用一事再見例略之

昭八年冬十月壬午楚師滅陳執陳公子招放之于越

殺陳孔真葬陳哀公

傳楚公子棄疾帥師奉孫吳圍陳十一年傳楚王奉孫吳以討于陳

曰將定而國陳人聽命而遂縣之八年
傳又言用穿封戌為陳公侍飲酒於王

十一年冬十

一月丁酉楚師滅蔡執蔡世子有以歸用之

傳楚子滅蔡用隱大

子于岡山城陳蔡不

羹使棄疾為蔡公

以上楚君滅國書師者二據下言執言放言殺言羹
言叔弓會楚子于陳則上書師為楚子而非棄疾明
矣下言執言以歸用之則上書師為楚子而非棄
疾矣傳記楚子在師事亦以明書師為非棄疾也蓋
此二事與入陳殺夏徵舒納公孫寧儀行父相類而

楚虔懷惡挾詐吞滅二國與厥祖討賊存陳不同故皆變文稱師以異之以其乘晉伯中衰而爭諸侯故得從恒稱以見實以其因中國無伯而滅陳蔡故又變文以示義也

天楚君將稱君而後大夫將稱大夫略之則稱

人

文十二年夏楚人圍巢

傳楚令尹子孔執舒子平及宗子遂圍巢

宣三年夏楚人侵鄭

八年夏楚人滅舒蓼

傳楚為衆舒叛故伐

舒蓼滅之楚子疆之
及滑汭盟吳越而還

冬楚師伐陳

成二年冬楚師鄭師侵衛

傳楚子重為陽橋之役以救齊曰君弱羣臣不如先大夫

師衆而後可乃悉師王卒盡行彭名御戎蔡景公為左許靈公為右冬楚師侵衛遂侵我師于蜀侵及陽橋

以上楚大夫將稱人者三稱師者二楚未書大夫將也

成六年秋楚公子嬰齊帥師伐鄭 七年秋楚公子嬰

齊帥師伐鄭 九年冬楚公子嬰齊帥師伐莒庚申莒

潰楚人入鄆

襄元年秋楚公子壬夫帥師侵宋 三年春楚公子嬰

齊帥師伐吳 五年冬楚公子貞帥師伐陳 七年冬

楚公子貞帥師圍陳 八年冬楚公子貞帥師伐鄭

十年夏楚公子貞鄭公孫輒帥師伐宋 冬楚公子貞

帥師救鄭 十二年冬楚公子貞帥師侵宋 十四年

秋楚公子貞帥師伐吳 十八年冬楚公子午帥師伐

鄭 二十五年秋楚屈建帥師滅舒鳩

昭六年秋楚蘧罷帥師伐吳 十一年夏楚公子棄疾

帥師圍蔡

定十四年二月辛巳楚公子結陳公孫佗人帥師滅頓
以頓子牂歸

哀十年冬楚公子結帥師伐陳 十三年夏楚公子申

帥師伐陳

以上楚大夫將書大夫者十九公子嬰齊莊王之弟
字子重為令尹共王幼始悉師救齊侵衛及魯蔡許
之君乘王車為左右故但書師於是會魯侯盟十一

國于蜀四年中再伐鄭一伐莒入鄆而晉遣鍾儀求
成于楚蓋楚之征伐自大夫出由嬰齊始時子反為
司馬傳言二卿相惡鄢陵之敗共王引過而子重責
子反死之至伐吳覆師喪邑以心疾卒士夫字子辛
代子重為令尹傳言公子申為右司馬多受小國之
賂以逼子重子辛見殺楚人討陳叛故曰由令尹子
辛實侵欲焉乃殺之其柄臣專利相傾如此故楚不
競公子貞莊王子也字子囊代子辛為令尹而晉人

懼與晉爭鄭乞師于秦以伐宋伐晉而卒失鄭伐吳
喪師還卒公子午莊王子也字子庚代公子貞為令
尹三年不出師曰吾以利社稷也鄭子孔欲叛晉而
起楚師以去諸大夫子庚弗許楚子欲伐鄭子庚請
先嘗之屈建字子木代遠子馮為令尹與晉趙孟相
知為宋之盟詐晉而駕馬以爭先故雖滅舒鳩書其
帥師遠罷字子蕩公子圍篡立而吞滅諸夏

闕

公子棄疾共王第五子康王

靈王之弟也使晉過鄭見鄭伯及諸大夫有禮皆知其將為王滅陳蔡為蔡公因陳蔡之人以入楚既為王復陳蔡公子結字子期公子申字子西皆昭王之兄也

成十七年冬楚子滅舒庸

傳楚公子索師襲舒庸滅之

十八年冬

楚人鄭人侵宋

傳十一月楚子重救彭城伐宋晉侯師于台谷以救宋遇楚師于靡角之谷楚

還師

昭十七年冬楚人及吳戰于長岸

傳楚令尹陽丐司馬子魚吳公子光

定二年秋楚人伐吳

傳楚囊瓦伐吳師于豫章

四年秋楚人圍蔡

冬十一月庚午蔡侯以吳子及楚人戰于栢舉楚師敗

績傳蔡侯吳子唐侯伐楚三戰子常知不可欲奔十一月庚午二師陳于栢舉夫槩王以其屬五千先擊子

常之卒子常之卒奔楚師亂吳師大敗之

哀九年夏楚人伐陳

以上楚大夫將稱人者七蓋有微旨子重帥師書於

經者詳矣侵宋避晉侯而還故略之橐師囊瓦陽丐

未嘗為中國寇患故有事變夷但書人圍蔡伐陳傳

不言其人自昭而後唯楚君大夫將奪其恒稱治在

夷狄也其嬰齊伐莒入鄆一事再見稱人乃史例

二十九年楚君大夫主盟會悉從其恒稱唯公及大夫
盟則人之

宣十一年夏楚子陳侯鄭伯盟于辰陵

成二年十一月公會楚公子嬰齊于蜀 丙申公及楚

人秦人宋人陳人衛人鄭人齊人曹人邾人郟人
盟于蜀

襄二十七年夏叔孫豹會晉趙武楚屈建蔡公孫歸生

衛石惡陳孔奐鄭良霄許人曹人于宋 秋七月辛巳
豹及諸侯之大夫盟于宋

昭元年春叔孫豹會晉趙武楚公子圍齊國弱宗向戌
衛齊惡陳公子招蔡公孫歸生鄭罕虎許人曹人于虢
四年夏楚子蔡侯陳侯鄭伯許男徐子滕子頓子胡
子沈子小邾子宋世子佐淮夷會于申

以上書楚子陳侯鄭伯盟者一公會楚臣而及諸侯
大夫盟者一內臣會晉楚南北之大夫盟者一會者

一楚君專合南北諸侯者一新城之後晉楚交爭陳
鄭晉加兵於陳者二於鄭者四楚加兵於陳者二於
鄭者五陳侯鄭伯既與楚子為辰陵之盟而陳侯即
如晉鄭亦徵事于晉故楚子入陳明年圍鄭春秋書
之以見中國無伯之禍至於如此而陳鄭之暫屈於
楚非其心也陳氏乃謂序楚子於陳侯鄭伯之上初
與楚以伯也則可謂反乎春秋之義矣楚君在幼而
嬰齊救齊侵衛以為蜀之盟楚師在境而公親會嬰

齊以及諸侯大夫盟諸侯大夫畏晉而竊與楚盟故人外大夫而不沒公會書嬰齊而盟稱人參譏之也凡公與外大夫盟譏在內則不諱公也趙武弭兵之言成於向戌遂以晉楚之從交相見而楚人劫晉以先歆楚誠未離乎夷狄也公子圍讀舊書加之牲上晉不復較蓋於是中國無伯矣而春秋書必先晉不以楚之彊而易華夷冠履之義也陳氏又謂此南北二伯也夫伯者以合諸侯攘夷狄尊王室為名義者

也晉既以諸侯與楚而甘出其下則晉自知不能以伯矣楚無列於王室以并吞諸夏為雄何伯之云是又失伯者所以得名之實矣楚圍弒君竊國求諸侯於晉大國若齊秦次國如魯衛小國若曹邾皆不能致宋太子至而後則東諸侯終未肯以事晉者而事楚也雖其臣舉六王二公之事其君欲用齊桓而椒舉已知其不濟宋鄭大夫亦幸其不能為吾患矣則雖侈然一時亦何能為哉春秋於楚君書爵終始志

夷狄之彊而已後世學者乃以五伯之說亂春秋之旨可乎

三荆始來聘稱人

莊二十三年夏荆人來聘

以上荆來聘書人者一荆之始聘未能成禮魯不廟受故不稱君不言使然不可但言荆來聘故書人與前稱荆皆從史文也欲見筆削本末故列于此

三楚臣來盟于師稱名氏不言使來獻捷言使

不稱君必中國無伯而後來聘稱君使

僖四年夏楚屈完來盟于師盟于召陵

以上楚臣來盟不稱使者一齊桓伯功莫先于服楚
春秋以楚能服義來盟故其臣始得以名氏書然齊
國佐如師稱使屈完不稱使何也使云者自敵以上
之所命也蠻夷僭王猶夏不可以敵命之故削其君
臣常辭不得比中國兵交使在其間者也

僖二十一年冬楚人使宜申來獻捷

以上楚臣來獻捷稱人使者一楚子既執宋公以伐
宋欲致魯侯來會故使人獻捷以威脅之於是公會
盟于薄釋宋公此夷夏之大變故存其來獻捷之文
以見實而楚子去爵稱人不得比中國伯主來獻戎
捷者同稱君也

文九年冬楚子使椒來聘

襄三十年春王正月楚子使薳罷來聘

以上楚使來聘稱君使者二凡來聘不月故楚子使

椒來聘亦不月遂罷來聘獨月者晉至悼公每以聘報朝襄公屬朝楚而還嫌於以聘報朝若中國盟主故特月以別之見中國無伯魯雖詘志朝楚而楚終不得以盟主之禮行乎諸侯也傳謂此來聘為通嗣君非也諸侯新君好命未通則有通嗣君之禮楚亦安能以此交諸侯觀楚人使公親禭而止公送葬則其所以待諸侯者可見矣魯君以前年十一月如楚聞康王卒猶往朝其嗣君踰年四月送葬乃得歸又

何通嗣君之有蓋楚人習聞晉悼公之事而為之與
椒之來聘亦異矣

三三楚君會而執中國諸侯不別言執之者

僖二十一年秋宋公楚子陳侯蔡侯鄭伯許男曹伯會
于孟執宋公以伐宋

以上楚君會而執諸侯者一凡會執必別言執之者
晉侯會諸侯同盟于戚晉侯執曹伯歸于京師此伯
主討有罪之文也楚子諸侯淮夷會于申楚人執徐

子此夷狄相執之文也楚子詐宋公于會而執之以
伐宋盟諸侯故削其楚人執之文蒙上文諸侯言之
既非夷狄相執之比亦不使與中國盟主執諸侯同
文也伐吳執齊慶封亦同

三楚君殺中國之君書名其自相殺不名

昭十一年夏四月丁巳楚子虔誘蔡侯般殺之于申
十六年春楚子誘戎蠻子殺之

以上楚君誘殺中國之君一既名蔡侯以謹其終又

名楚子以正其罪以夷狄殺中國之君故詳之也楚君誘殺戎君者一皆不名以夷狄自相殺則略之也是故一日一不日

三十四諱夷狄執王臣變執言伐諱夷狄獲中國之君變獲言以歸

隱七年冬戎伐凡伯于楚丘以歸

莊十年秋九月荆敗蔡師于莘以蔡侯獻舞歸

以上戎執王臣言伐者一公羊傳曰執之也其言伐

之不與夷狄之執中國也據獲麟後有書執其君者則史書戎執王臣必無隱避於是夫子改書伐為中國諱也荆獲蔡侯言以歸者一公羊傳曰獲也不言其獲不與夷狄之獲中國也是亦諱辭又案此戰也不言戰而言敗者穀梁傳曰夷狄中國不言戰也二傳此類必有所受蓋既變獲言以歸則不得復言戰也

三四吳征伐恒舉號惟為中國討罪得稱君

成七年春吳伐郟 秋吳入州來

襄二十五年十二月吳子遏伐楚門于巢卒

昭十三年冬吳滅州來 十七年冬楚人及吳戰于長

岸傳楚令尹陽
弓吳公子光二十三年秋七月戊辰吳敗頓胡沈

蔡陳許之師于雞父胡子髡沈子逞滅獲陳夏齧傳吳
子以

罪人三千先犯胡沈與陳中

二十四年冬吳滅巢

軍從王光帥右掩餘帥左

三十年冬十二月吳滅徐徐子章羽奔楚傳吳子執鍾
吾子遂伐徐

三十二年夏吳伐越

定四年冬十一月庚午蔡侯以吳子及楚人戰于柏舉

楚師敗績 庚辰吳入郢

哀六年春吳伐陳 八年春吳伐我

傳吳伐我王舍于庚宗遂次于泗上

十年春公會吳伐齊

傳公會吳子

冬吳救陳

十一年

五月公會吳伐齊

傳公會吳子伐齊

甲戌齊國書帥師及吳

戰于艾陵齊師敗績獲齊國書

以上吳伐四伐我一公會伐二戰三敗一入二滅三

救一皆以號舉君臣同辭雖我君會伐亦舉號而已

遏伐楚從卒例唯柏舉之戰為中國復讎討罪故得稱爵而書蔡侯以之其戰與入又皆書日以別於夷狄自相戰與入者亦夷狄而中國則中國之之義也楚為中國患有自來矣而始終受其荼毒者唯蔡為甚城濮之役欒貞子曰漢陽諸姬楚實盡之思小惠而忘大恥不如戰也吳人亦謂隨人曰周之子孫在漢川者楚實盡之天誘其衷致罰於楚而君又竄之周室何罪然自齊桓晉文之盛而不能加兵於其國

都雖劉文公合十八國之師於召陵而不能一問其
罪卒之攄中國神人之積憤者吳也是以聖人特詳
焉戰言吳子而入舉號者一役再有事則從其恒稱
也雖然此一役也滅國可興文武之境土可復惜乎
吳無君臣不足以居其功而晉衰已甚劉卷既卒無
能起而收之者春秋徒致意焉而已爾

三六中國會而會吳恒舉號雖吾君大夫特會之
舉號必以諸侯之禮接而後稱君

成十五年冬十一月叔孫僑如會晉士燮齊高無咎宋
華元衛孫林父鄭公子鮪邾人會吳於鍾離

襄五年夏仲孫蔑衛孫林父會吳于善道 秋公會晉

侯宋公陳侯衛侯鄭伯曹伯莒子邾子滕子薛伯齊世

子光吳人鄆人于戚 十年春公會晉侯宋公衛侯曹

伯莒子邾子滕子薛伯杞伯小邾子齊世子光會吳于

柤 十四年春王正月季孫宿叔老會晉士匄齊人宋

人衛人鄭公孫薑曹人莒人邾人滕人薛人杞人小邾

人會吳于向

哀六年夏叔還會吳于祖 七年夏公會吳于鄆 十

二年夏公會吳于橐臯 十三年夏公會晉侯及吳子

於黃池

以上內大夫會諸侯大夫又會吳者二魯衛大夫會

吳者一公會諸侯有吳人者一公會諸侯又會吳者

一內臣特會者一公特會者二會晉侯及吳子者一

凡稱吳皆其君夷狄舉號之例也吳雖秦伯仲雍之

後武王所封然居夷僭號不可以中國諸侯之禮接
故諸國自為會而後會之史文未得比楚君稱子與
諸侯序也稱人者其大夫以外臣禮序齊世子下則
不殊也祖之會傳曰會吳子壽夢也則會向為諸樊
哀公之會皆夫差也鄆之會吳人曰魯宰晉大夫過
十吳王百宰不亦可乎說苑載晏子使吳行人曰天
子請見晏子儼然者三曰臣受命敝邑之君將使於
吳王之所不佞而迷惑入于天子之朝敢問吳王惡

乎存然後吳王曰夫差請見見以諸侯之禮其禮文不典皆此類也故凡大夫之會不月而鍾離與向特月以異之黃池兩主之會故得稱爵傳言秋七月辛丑盟吳晉爭先吳人曰於周室我為長晉人曰於姬姓我為伯乃先晉人吳人將以公見晉侯子服景伯對使者曰執事以伯召諸侯而以侯終之蓋吳至是始竊侯伯之禮以會諸侯而魯史亦假子爵以記其事也外傳載夫差言周室卑約貢獻莫入晉負衆庶

不式諸戎狄楚秦以力征一二兄弟之國晉令董褐
對曰君掩王東海以淫名聞天子君有短垣而自踰
之況蠻荆則何有於周室夫命圭有命固曰吳伯不
曰吳王君若無卑天子而干其不祥而曰吳公孤敢
不順從吳王許諾乃退就幕而會吳公先歆晉侯亞
之其言先歆與左氏不同載書降稱吳公理或然也
戚之會吳晉嘗盟矣不書黃池復盟亦不書者陳氏
曰為晉諱也吳晉之盟春秋終諱之不以吳晉同主

盟也蓋自晉厲公始通吳於上國而悼公猶汲汲於會吳皆欲以吳撓楚魯昭違禮昏吳亦由晉衰欲倚以敵齊楚也而皆不稽其終是時魯賦於吳八百乘邾賦於吳六百乘微百宰藩衛侯之舍囚子服景伯長此安窮是故春秋於吳晉之盟終諱之然吳入越不書而再書越入吳固知吳之將為沼矣

三七越舉號從其恒稱

昭五年冬楚子蔡侯陳侯許男頓子沈子徐人越人伐

吳

定五年夏於越入吳 十四年五月於越敗吳于檇李
吳子光卒

哀十三年夏於越入吳

以上越人從楚伐一敗一入二於越勾吳皆蠻夷之
號也然春秋書吳者以武王嘗封之則吳其國名也
越之先禹之苗裔始封於會稽曰於越者以其自號
舉之不書越者非其封國也傳曰越大夫常壽過帥

師會楚子於瑣則伐吳稱人者常壽過也凡四夷從中國序列則稱人以便文若邠人狄人伐衛戚之會稱吳人是也故便文則曰越人復其恒稱則曰於越陳氏謂常壽過得稱人若進之者誤矣定十四年傳言吳伐越越子勾踐禦之陳于檣李患吳之整是皆陳也而不書戰哀十三年傳記六月丙子越子伐吳乙酉戰丙戌復戰大敗吳師獲太子友王孫彌庸壽於姚丁亥入吳而經不書爵不書戰入又不書月與

吳入郢特異者越與吳世相讎則以夷狄自相攻之
法治之而已自晉通吳以撓楚而楚卒覆於吳楚亦
連越以伐吳而吳屢覆於越然外傳記范蠡之言曰
吾先君固周室之不成子也濱於東海之陂鼃鼃之
與處而鼃鼃之與渚余雖覩然而人面哉吾猶禽獸
也則越之所以彊於蠻夷者可知矣

三六徐見敗伐國皆以號舉國滅則書君奔而名
之

僖三年夏徐人取舒 十五年冬楚人敗徐于婁林

文七年冬徐伐莒

以上書徐人一敗徐一徐伐一敗不言師侵伐舉號皆夷狄恒辭然經書徐取舒得稱人者自公會宋人齊人伐徐徐已事齊以其即諸夏而取國於蠻夷故得稱人齊桓卒徐復通楚以其從夷狄而伐中國故復其恒稱蓋舒乃楚之微屬而莒世從晉內外之義辯矣然當徐服齊時見敗于楚亦不得稱師者徐之

為夷久矣未可以頓革也史記言徐出柏翳與秦同
祖然三監流言時一叛伯禽撫封時再叛費誓稱徐
戎則非中國諸侯比矣徐偃王事史記後漢書皆言
在周穆王時既為天子所伐走死失國民戴其嗣君
如初而駒王復彊然後漢書云楚文王滅之蓋本楚
辭荆文悟而徐亡事與春秋經傳皆不合蓋其先彊
僭不異吳楚東周後始微弱也檀弓記邾考公之喪
徐君使容居來弔欲用諸侯相於禮親含有司拒之

容居對曰昔我先君駒王西討濟於河無所不用斯言也徐滅於吳楚僅存之至是已再世而蠻夷僭竊之制猶未能盡革則齊桓之時雖來即諸夏未容一切以中國諸侯之禮治也

昭三十年冬十二月吳滅徐徐子章羽奔楚


以上國滅君奔稱名者一春秋國滅君奔未有書名者而徐子獨名以奔楚也徐暫事齊後世仍服於楚申之會徐子在列楚人以其吳出也執之乾谿之役

又圍之以懼吳則徐蓋兩事吳楚卒以違吳人執亡
公子之命見滅於吳雖楚為出師救之無及也楚為
中國患天將假手於吳以覆之而徐猶惓惓於楚以
取滅亡則其世服蠻夷之效也故因其奔楚特書名
以異之明不得與弦子温子國滅於夷狄而君奔中
國者比也徐雖以號舉然其先本古之建國嘗服事
于周是以聖人猶詳之若晉滅陸渾陸渾子奔楚則
不復書進不得齒於諸夏退不忍終棄諸蠻夷此春

秋治在夷狄之權衡也



春秋屬辭卷十二



覆校官編修臣朱依魯

校對官檢討臣季學錦

騰錄監生臣朱恂